

自明降住天關并地軸斡旋坎虎與離龍猿顛馬劣難成道虎
遶龍蟠易見真心中事少憂愁少性上塵多疾苦多有有中
非有有無無無裏有無無

鈺因與僧燭律師殿試范壽卿於郡城之北三教堂一日
焚香冥坐有王大師抱琴而來鼓之日晷作琴操歸山操
蓋鈺有歸真之意也

能無爲兮無不爲能無知兮無不知知此道兮誰不爲爲此道
兮誰復知風蕭蕭兮木葉飛聲嗷嗷兮雁南歸嗟人世兮日月
催老欲死兮猶貪癡傷人世兮魂欲飛嗟人世兮心欲摧難可
了兮人間非指青山兮當早歸青山夜兮明月飛青山曉兮明
月歸饑餐霞兮渴飲溪與世隔兮人不知無乎知兮無乎爲此
心滅兮那復疑天庭忽有霜華飛登三宮兮遊紫微

癸卯歲師父重陽真人一日俄肆筆而書名曰委形贊是
歲果蟬蛻故集於是

衛身之光照耀非常衛身之獸風雲前後大哉登真委形而壽
紺髮青眉紅頰素肌如龍換骨如蟬蛻皮不作易性奚爲空衣
兀然若睡臥簣而歸大哉登真路入青溟麟隨絳節鳳捧朱輶
鳴鸞佩玉履虛步雲超受真誥上登玉宸天路何長天人飛翔
縱金拊石散花燒香聲動三界衆來十方羣魔欽仰六丁驚遑
靈穎斯成幸無災螟卻顧松柏非爲遐齡山有時崩海有時田